

# LA QUOTIDIANA

FMR Fundaziun Medias Rumantschas, Via da Masans 2, 7000 Cuiru, 081 544 89 11, redacziun@fmr.ch



## Pitschnas ma bleras activitads a Sumvitg

Dacurt ha Sumvitg Turissem salvà sia radunanza generala e rapportà davart ses projects. **Pagina 5**



## Valsot: L'emprim «capo cumünal» chala

Victor Peer è stà dapi l'onn 2007 capo dal Cumün da Valsot. Per la fin da quest onn va el en pensiun. **Pagina 7**

FMR FUNDAZIUN  
MEDIAS  
RUMANTSCHAS

südostschweiz

## GRISCHUN

### Ura da dumondas – ura per in'utopia

Pudess ins spargnar locomotivists u locomotivistas cun trens che charreschan senza personal tras il Vereina? En l'ura da dumondas dal Cussegl grond vegnan adina tratg a strada ils temas pli actuals – la mesemna era ina pitschna utopia.

Dal tut utopica n'è la dumonda dals trens autonomis però betg ch'il deputà *Reto Cramer* ha inoltrà. Cusseglia governativa *Carmelia Maissen* ha respundi: «Tenor indicaziuns da la Viafier retica fiss il tunnel dal Vereina adattà per in manaschi da test. Al Vereina na planisescha la viafier dentant nagin manaschi cumplainmain automatic. Ils trens ston per motivs da segirezza adina vegnir accompagnads.» (fmr/vi) **Pagina 2**

## SURSELVA

### Salvar insects cul bastun da golf

Il Club da golf Buna Vista Sagogn ha realisau in project da biodiversità sin la piazza da golf che schai sigl intschess dallas duas vischnaunca Sagogn e Schluein. Ensem cun las organizaziuns Grischun Vacanzas, Terraviva ed igl Uffeci cantunal dalla natura e digl ambient han ils representants dalla piazza da golf e dall'Associaziun grischuna da golf presentau ier mesjamna il project allas medias. Finamira dil project da biodiversità ei da porcher in territori da catscha alla colonia da miezmiur e mieztschi ch'ei dacasa ella tuor dalla baselgia reformada da Sagogn. La secunda finamira ei da scaffir in refugi per insects ed animals pigns. Per realisar il perimenter da biodiversità han ins plantau igl onn vargau 25 enfiaras e 200 caglioms sin differents tschan-cuns dalla piazza da golf. (fmr/mg) **Pagina 6**



Sguard per liung d'ina part dil perimenter da biodiversità silla piazza da golf a Sagogn **FOTO MARTIN GABRIEL**

## SURSELVA

### Purschida d'activitads per immigrai

La Crusch Cotschna Svizra dil Grischun tschercha persunas voluntarias ch'ei promptas da sefatschentar d'immigrai. In'emprova co quei savess esser vegn fatga il proxim temps el center per requires d'asil a Mustér el rom dil project Connect. «Nus tscherchein voluntaris ch'ei prompts da far sport, activitads creativas ni semplamein dar ina discurrenda cun els», di *Salka Bucher* dil post da migraziun dalla Crusch Cotschna Svizra dil Grischun. Biars immigrai han strusch contacts socials. Cheutras san els era buca far per exempel novas experienschas linguisticas ed er buca s'integrar tec a tec ella societad. (fmr/hh) **Pagina 6**



Servetsch d'abunents e da distribuziun: tel. 0844 226 226  
mail: abo@somedia.ch



## Weishaupt banduna la scena

Intervista cun il director partent dal Teater Cuiru.

**Pagina 3**

«Mes cor batta anc adina per «les Bleus» d'antruras.»

Gabriela Riedi sa legrass sche Zinedine Zidane giugass anc en l'equipa naziunala da ballape da la Frantscha – **Pagina 2**

## In'ulteriura halla da gimnastica a Glion

La Regiun Surselva sto survegnir ina localitad per l'instrucziun da gimnastica dil mument che la scola mercantila e la scola propedeutica midan domicil dalla claustra dominicana els novs stabiliments dalla staziun a Glion.

MARTIN GABRIEL/FMR

La Regiun Surselva ei actualmeins vidlunder da reglar cul cantun Grischun e cun la Viafier retica il contract d'affittaziun en ils novs stabiliments alla staziun da Glion, ch'ei il niev liug da scola dalla scola mercantila e dalla scola propedeutica dalla Surselva naven da 2028. Il cantun approbescha il contract d'affittaziun mo cun la cundiziun, ch'ei detti era ina localitad per far gimnastica. Ils davos onns han la Regiun Surselva e la vischnaunca Ilanz/Glion

«Igl ei semussau che la construcziun d'ina halla da gimnastica entras la Regiun Surselva füss la pli favoreivla s'ligiazium»

Marcus Beer,  
president communal Ilanz/Glion

evaluau pliras variantas per integrar la gimnastica dil Center da formaziun Surselva. Ina da quellas variantas ei la construcziun d'ina halla supplementara sigl areal dalla scola da Glion. «Igl ei semussau che la construcziun d'ina halla da gimnastica entras la Regiun Surselva füss la pli favoreivla s'ligiazium», rispunda il president communal *Marcus Beer* alla damonda dalla FMR. Il parlament communal da Glion ha da decider proxima mesjamna davart il dretg da construcziun d'ina parcella alla Regiun Surselva. **Pagina 5**